

SOLIDARITI PEKERJA



ISU KE - 11

APR - MEI 2015

HARGA : RM 2 / SOLIDARITI : RM 3

RAKYAT TERUS TERHIMPIT



LAWAN KAPITALISME.... BINA ALTERNATIF

Kamal

Belum lagi GST dilaksanakan, peningkatan tambang teksi, bas dan keretapi sudah dimaklumkan, dan ditambah pula dengan kenaikan harga barang dan perkhidmatan asas, kehidupan rakyat biasa kini semakin terhimpit. Kesannya lebih teruk mulai 1 April apabila rakyat terpaksa menanggung GST, tetapi pendapatan isirumah tidak berlandaskan kepada peningkatan kos hidup, bermakna kebanyakan rakyat terpaksa mengambil hutang. Dalam setahun terakhir ini setiap hari kita dipaparkan dengan iklan di televisyen menjelaskan bagaimana sistem cukai ini sangat baik dan telus. Namun sekarang rakyat biasa sudah merasakan langsung impak daripada GST. Apakah benar majoriti harga barang di pasaran menurun seperti

yang dikatakan oleh kerajaan? Atau sebaliknya kita sudah mendapatkan bukti itu adalah satu lagi pembohongan? Apakah nasib ekonomi rakyat sekarang ini lebih baik dibandingkan sebelum adanya GST? Yang jelas kapitalisme (sistem pemodal) melebarkan sayapnya untuk mengaut keuntungan dengan menghimpit keperluan rakyat. Kerajaan dan kapitalis (pemodal) adalah yang paling diuntungkan oleh GST. Jumlah 6% daripada pembelian barang-barang tertentu dari 29 juta rakyat Malaysia setiap hari akan masuk ke dalam tabung kerajaan. Ini boleh memberikan pendapatan berbilion ringgit setahun. Tetapi rakyat juga sangat kecewa dengan pemborosan dan ketirisan yang dilakukan oleh kerajaan, diantaranya skandal 1MDB dan

pembelian satu lagi pesawat kerajaan. Pada masa yang sama penurunan mata wang ringgit dan hutang luar negara yang meningkat 3.5 kali ganda dalam masa setahun melembapkan ekonomi negara. Oleh kerana itu tidak hairan jika banyak pihak yang curiga bahawa GST dipaksa untuk dilaksanakan bagi menutupi kekurangan bajet akibat salah urus kewangan kerajaan.

Cukai sepatutnya dipertingkatkan kepada kelompok masyarakat berpendapatan tinggi dan kapitalis-kapitalis yang mengaut keuntungan besar. Sedangkan GST akan dilaksanakan tanpa membezakan status pendapatan. Mungkin kita hanya perlu membayar lima atau enam ringgit lebih sahaja untuk GST dan jumlah ini tidak

bermakna bagi mereka yang berpendapatan tinggi, tetapi itu sangat membebankan bagi pekerja yang berpendapatan rendah atau sederhana. Ini jelas adalah persoalan pertentangan kelas di antara golongan kaya dan kelas pekerja atau rakyat miskin.

GST juga akan mengakibatkan lebih 300,000 individu yang 'mampu' membayar cukai pendapatan tidak perlu lagi berbuat demikian kerana beban cukai mereka akan ditutupi oleh GST. Ini bermakna rakyat keseluruhan mesti menanggung pendapatan kerajaan yang selama ini hanya dibebankan kepada mereka yang mampu membayar cukai pendapatan, iaitu golongan berpendapatan tinggi sahaja. Sekali lagi jelas bahawa ini soal pertentangan kelas.

Bagaimakah sikap rakyat biasa, anak muda dan kelas pekerja? Apakah masih sanggup bertahan dengan tekanan hidup yang terus bertambah? Puluhan ribu rakyat telah turun ke jalan membantah GST pada 1 Mei 2014, bertepatan dengan Hari Pekerja. Hari pekerja tahun ini rakyat masih dihadapkan dengan isu yang sama. Bezanya, kali ini rakyat telah merasakan langsung akibat GST. Kerajaan dan parti politik yang memihak kepada golongan kapitalis tidak akan menyelesaikan isu dan keperluan rakyat. Agenda kapitalisme perlu dilawan, dan untuk itu warga pekerja, anak muda dan rakyat biasa yang lain tiada jalan selain bersatu tenaga bagi membentuk politik alternatif yang bebas daripada kongkongan kapitalis dan penyokong-penyokongnya.

Pekerja Kuasa Perubahan!

Ian

Sejak awal perlaksanaan pada Januari tahun 2013, gaji minima sejumlah RM900 di Semenanjung dan RM800 di Sabah dan Sarawak dianggarkan memang tidak mencukupi untuk memenuhi keperluan hidup pekerja. Jumlah tersebut adalah tuntutan pekerja pada tahun 2002 dan hanya dilaksanakan sebelas tahun kemudian. Tentu saja dalam tempoh masa itu situasi ekonomi sudah jauh berubah dan keperluan semakin mendesak. RM900 jauh dari keperluan untuk pekerja bujang yang tinggal di kawasan Lembah Kelang sekalipun, apalagi untuk pekerja yang sudah berkeluarga. Itupun belum mengambil kira pelaksanaan gaji minima yang masih banyak kecacatan. Masih banyak syarikat yang ingkar mematuhi dasar gaji minima dan tidak ada tindakan apa-apa yang dikenakan oleh kerajaan. Gaji minima juga tidak dilaksanakan kepada pekerja asing, seolah-olah keperluan hidup mereka kurang sedikit berbanding pekerja tempatan. Ini jelas sikap diskriminasi majikan.

Dengan mengambil kira perkembangan ekonomi yang semakin merudum akhir-akhir ini, di mana harga barang semakin meningkat, jumlah gaji minima yang sedia ada sekarang jelas jauh dari mencukupi. Apalagi dengan pelaksanaan GST akan menyebabkan daya beli pekerja bergaji rendah semakin menurun. Oleh itu, tuntutan gaji minima sebanyak dua kali ganda dari jumlah sekarang adalah satu perkara yang wajib dituntut oleh pekerja. Dan memang sudah sewajarnya penetapan gaji minima mesti ditinjau ulang masa ke semasa mengikut keadaan ekonomi semasa. Dan gaji minima itu mesti ditentukan berdasarkan jumlah di mana pekerja dapat menyara hidup, bukan atas dasar pertimbangan keuntungan majikan semata-mata. Misalnya kita ambil contoh di negara jiran Indonesia, pekerja di sana menuntut gaji minima dinaikkan setiap tahun dengan mengambil kira faktor kenaikan harga minyak dan inflasi. Bahkan harga barang

keperluan hidup pekerja sehari-hari seperti lampin wanita, minyak wangi, sabun mandi, shampoo, dan keperluan atas lainnya diambil kira dalam menentukan jumlah kenaikan gaji minima. Kesatuan sekerja mereka melakukan penyelidikan di lapangan untuk mendapatkan jumlah yang tepat berapa gaji minima yang layak dan

sesuai dengan keperluan hidup sehari-hari pekerja. Kaedah yang digunakan pun bukan hanya menghantar memorandum atau melalui rundingan sahaja, tetapi mesti melakukan mogok kerja dan turun ke jalan raya. Jika tidak demikian, maka tuntutan mereka tidak akan mendapat kemenangan. Sedangkan di Malaysia, kerajaan

tidak menetapkan sampai bila kadar gaji minima sekarang akan berlanjut. Jika tidak ada tuntutan dari pekerja, maka jumlah RM900 itu akan bertahan sampai bila-bila. Jadi semuanya bergantung kepada kuasa warga pekerja. Selesa dengan gaji minima sekarang atau bangkit membuat tuntutan.



80 Peratus Pekerja Mempunyai Simpanan KWSP Di Bawah Garis Kemiskinan !

Ravi

Data baru daripada KWSP menunjukkan hampir 80 peratus pekerja yang akan mencécah umur 55 pada tahun ini tidak akan mempunyai duit simpanan mencukupi dalam KWSP. Ini

bermakna simpanan KWSP mereka tidak cukup untuk membolehkan mereka hidup dengan RM800 sebulan, yang hampir dengan gaji purata bagi garis kemiskinan Malaysia,

untuk 20 tahun akan datang. Ini kerana kebanyakan pekerja memperoleh gaji yang rendah apabila mula menyumbang kepada KWSP dalam tahun 1980an, dan terus memperoleh

gaji rendah sehingga umur 55 tahun. Lebih 75 peratus daripada 14 juta pencarum KWSP berpendapatan kurang daripada RM2,000 sebulan.

Perkembangan ini mendedahkan percanggahan dalam matlamat kerajaan untuk menjadikan Malaysia sebuah negara berpendapatan tinggi dalam tempoh lima tahun. Salah satu punca kepada keadaan ini adalah polisi buruh murah yang telah dimulakan oleh Mahathir dan dilanjutkan sehingga ke kerajaan sekarang terus dipergunakan oleh kapitalis untuk mengaut keuntungan dengan sewenang-wenangnya. Majikan dan kapitalis juga menidakkannya hak berkesatuan dan hak mogok untuk pekerja menuntut gaji yang adil dengan kelonggaran undang-undang yang diberikan oleh kerajaan.

Data KWSP tersebut juga mencerminkan hakikat sebenar kehidupan pekerja di Malaysia, di mana mereka terpaksa bekerja selepas usia 55 bagi memastikan mereka mempunyai simpanan mencukupi sepanjang hayat. Perkembangan ini diburukkan lagi dengan hakikat Malaysia adalah sebuah negara yang pesat usia tua. Pada 2030, 17 peratus penduduk akan berusia di atas 65 tahun dan pada 2040, mereka yang berumur 65 tahun akan melebihi bilangan individu yang lebih muda.

Kenyataan ini dengan jelas menunjukkan jurang kaya miskin yang semakin melebar dan polisi-polisi kerajaan yang berlandaskan kepada sistem pasaran bebas bermotifkan keuntungan maksimum semakin memudarati kehidupan rakyat biasa. Dari muda sehingga ke usia tua pekerja ditindas dan terus tertekan. Selagi keperluan dan kebijakan rakyat diabaikan, gejala ini akan berterusan.



Mahathir Lawan Najib : Bapa Borek Anak Rintik!

Ravi

Kritikan terbuka Mahathir terhadap Najib telah meningkatkan konflik dalam UMNO. Mahathir mengutuk Najib terhadap kerugian 1MDB, penyalahgunaan kuasa, peningkatan kekayaan keluarga Najib hingga kepada cara pengendalian ekonomi dan pentadbiran kerajaan yang tidak cekap.

Tetapi, politik Najib yang dicorakkan di bawah kerajaan Mahathir sehingga Mahathir telah menyokong Najib sebagai Perdana Menteri untuk menjatuhkan Abdullah Badawi. Abdullah Badawi pada satu ketika adalah 'ayam tambatan' untuk mengambil tampuk kepimpinan Mahathir, tetapi kekalahan teruk BN dalam PRU12 pada tahun 2008 menggali kubur untuk pemerintahannya.

Mahathir pada pemerintahannya telah membawa masuk agenda liberalisme baru dalam bentuk perindustrian dan penswastaan

yang telah meragut hak demokrasi, hak berkesatuan serta telah meningkatkan kos hidup rakyat. Bukti-bukti baru didedahkan tentang pembaziran berbilion-billion ringgit ketika pemerintahan Mahathir. Pengumpulan harta tiga anak Mahathir yang lebih 60 billion ringgit juga menjadi tanda tanya. Penyalahgunaan kuasa, pemerintahan kukubesi yang mencantas hak-hak demokrasi dan kronisme bermaharajalela ketika tampuk pemerintahan Mahathir. Hak buruh dan hak berkersatuun dihakis oleh Mahathir semata-mata untuk memuaskan nafsu keuntungan pelabur-pelabur asing. Mahathir ingin 'menutup pekung di dada' dan mengkritik Najib ke atas skandal dan kemelut yang juga wujud ketika pemerintahannya.


Bagaimana acuan begitulah kuihnya. Mahathir adalah pelopor agenda pasaran bebas dan kapitalisme yang diperkasakan ketika pemerintahannya melalui

agenda-agenda liberalisme baru. Najib menggunakan 'acuan' (kapitalisme) yang sama yang telah dipergunakan oleh Mahathir untuk menjanaan 'kuih-kuih' (polisi seperti GST, pemotongan subsidi, TPPA dll) yang baru tapi dengan motif yang sama yang berlandaskan kehendak 'acuan'. Siapa sahaja penganti Najib

dalam UMNO selepas ini atau pembangkang mengambil tampuk pemerintahan, jika acuan ini tidak dihancurkan, maka masalah dan kemelut kapitalisme akan terus mengkongkong agenda kerajaan dan keperluan rakyat akan dianaktirikan.

Solidariti Pekerja menyeru

kepada anak muda dan kelas pekerja agar alternatif yang baru dibina untuk membolehkan agenda dan keperluan rakyat menjadi keutamaan. Ini perlu dilakukan tanpa tunduk kepada elemen-elemen kapitalisme, dan agenda anti-kapitalisme diperkuuhkan untuk membina alternatif yang jelas.



Akta Hasutan Pengganti

ISA ?

ISA (Akta Keselamatan Dalam Negeri) yang diwujudkan pada zaman darurat telah dimansuhkan beberapa tahun lalu. Pada zaman pemerintahan Mahathir, ISA dipergunakan secara meluas untuk memenjarakan ahli-ahli politik pembangkang. Sebelum itu ia pernah digunakan untuk menahan pemimpin kesatuan, pemimpin pelajar dan aktivis. ISA dilihat sebagai alat kerajaan BN untuk melenyapkan suara pembangkang atau penentangan terhadap polisi-polisi kerajaan.

Dengan penangkapan beberapa pemimpin pembangkang dan aktivis di bawah akta hasutan, ramai beranggapan bahawa Akta Hasutan adalah ISA



baru untuk memberhentikan penentangan terhadap kerajaan. Setakat ini bukan sahaja pemimpin dan aktivis politik ditahan di bawah akta ini, malahan pensyarah, peguam, kartunis juga ditahan kerana meluahkan pandangan mereka terhadap kerajaan.

Kamarul

10,000 Rakyat Turun Protes 'Kita Lawan'

Pada 7 Mac yang lalu, lebih 10,000 rakyat yang kebanyakannya anak muda turun protes di Kuala Lumpur bagi membantah polisi-polisi kerajaan. Mereka berarak daripada Pasar Seni, Masjid Jamek hingga ke KLCC untuk menyatakan bantahan mereka.

Rakyat berbagai kaum menyertai perarakan tersebut bukan sahaja untuk membantah tindakan kerajaan terhadap pemenjaraan Anwar Ibrahim dan menuntut hak demokrasi, malah untuk

meluahkan rasa ketidakpuasan mereka terhadap polisi sosial dan ekonomi kerajaan yang semakin menekan rakyat. Justeru untuk memperkuatkan gerakan rakyat, anak muda selain membawa agenda demokrasi, perlu juga menghubungkaitkannya dengan isu-isu sosial dan ekonomi yang mencengkam rakyat untuk mendapatkan sokongan daripada kelas pekerja dan rakyat tertindas yang lain.



Solidariti Pekerja menyokong hak rakyat untuk berdemonstrasi atau membuat protes yang merupakan hak asasi kemanusian, dan membantah akta hasutan yang jelas bercanggah dengan hak demokrasi.

Sarawak: Negeri Kaya Rakyat Miskin

Erick

Dewan Undangan Negeri Sarawak bakal tamat tempoh pada Jun 2016. Namun, Adenan Satem yang baru menyandang jawatan Ketua Menteri sejak Februari lepas dilihat sudah berada di barisan hadapan untuk berkempen di media cetak dan elektronik. Pada 14 Mac, Adenan mengetengahkan cogan kata "Beri Saya Peluang" sebagai persediaan pilihan raya negeri.

Dengan menggunakan imej tegas, turun padang dan mesra rakyat, Adenan menonjolkan diri di setiap majlis perayaan bahkan menjadi perhatian di peringkat nasional dengan keputusan membenarkan penggunaan perkataan "Allah" oleh masyarakat bukan Muslim, membantah

panggilan berbau perkauman "Cina adalah pendatang" dan mengisyiharkan "perang" terhadap pembalak haram dengan memberi kelengkapan senjata api kepada pegawai perhutanan negeri.

Pakatan Rakyat (PR) Sarawak pula cuba mempergunakan isu-isu korupsi dan tekanan sosial yang dihadapi oleh rakyat sebagai modal politik untuk memenangi lebih banyak kerusi.

Di sebalik semua itu, gaji minimum RM800 masih di bawah paras kemiskinan RM916 jika mengikut kajian pada tahun 2009. Sarawak juga masih berada di kelompok antara negeri termiskin selepas Sabah, Terengganu dan Kelantan

walaupun mempunyai simpanan tunai kerajaan lebih RM20 bilion dan hasil bumi yang lain. Ternyata Barisan Nasional ataupun Pakatan Rakyat gagal memberi sesuatu alternatif

untuk menyelesaikan masalah asas rakyat biasa. Ini jelas menunjukkan pekerja, anak muda serta masyarakat orang asal di Sarawak perlu bergabung dengan rakyat biasa di negeri-

negeri lain untuk membentuk politik alternatif untuk membebaskan rakyat daripada kemiskinan dan diskriminasi.



Orang Asal Tuntut Bank Batal Pinjaman

Erick

Mac 4 yang lalu, sekumpulan wakil daripada 40 pertubuhan Orang Asal dari Sarawak telah ke ibupejabat Bank Pembangunan Asian (ADB) di Manila untuk menyuarakan kebimbangan mereka berkenaan pinjaman USD 45 Million (RM 148 Milion) yang sedang dipertimbangkan untuk Sarawak Energy Berhad(SEB) , syarikat berkaitan negeri Sarawak (GLC) bagi membiayai pembinaan talian penghantaran kuasa elektrik bervoltan tinggi ke Kalimantan Barat, Indonesia.

Menurut salah seorang wakil, Thomas Jalong, Presiden Jaringan Orang Asal SeMalaysia (JOAS), perbincangan dengan masyarakat yang tinggal di kawasan berhampiran dengan projek itu jelas menunjukkan SEB gagal mengadakan

rundingan bagi mendapat persetujuan untuk memajukan kawasan tanah adat mereka untuk projek pembinaan tersebut. Tambah beliau juga, ADB mesti segera membatalkan pinjaman kepada SEB kerana gagal mematuhi amalan asas kod etika bank itu dalam urusan projek berkenaan.

Pada Mac 10, pegawai ADB mengumumkan pihak pengurusan Bank akan meneliti kembali pinjaman kepada SEB. Namun, pihak SEB pasti tidak akan mengalah dengan mudah dan cuba mencari jalan untuk mendapatkan dana pembinaan projek tersebut. Oleh itu, pertubuhan Orang Asal harus mencari sokongan dengan para pekerja dan pelajar di bandar bagi memberhentikan projek pembinaan yang melanggar hak-hak mereka.



Kecamuk Politik di Sabah: Alternatif perlu dibina !

Sharifah

Februari lepas, Ahli Parlimen Putatan (BN), Marcus Mojigoh menyatakan bahawa dia mungkin mempertimbangkan untuk berhenti politik dan tidak mencalonkan diri dalam PRU-14 kerana penat dengan dasar 'flip-flop' yang menyebabkan ramai orang semakin marah dengan kerajaan Barisan Nasional. Dia juga kecewa terhadap politik perkauman dan dasar-dasar kerajaan yang tidak konsisten di Sabah.

Luahan ini bukan sesuatu yang baru dan semakin ramai ahli parlimen atau wakil rakyat di Sabah yang kecewa dengan dasar-dasar Barisan Nasional yang tidak menyebelahi kepentingan rakyat. Ahli Parlimen Kalabakan (BN), Abdul Ghapur Salleh juga pernah menyuarakan kebimbangan terhadap tahap kemiskinan yang sangat teruk di Sabah. Bahkan, kenyataan Ahli Parlimen Kinabatangan (BN) Bung Mokhtar mengejutkan ramai pihak kerana mengkritik kerajaan persekutuan yang menganaktirikan negeri itu. Dia mengulas tentang eluan perumahan pegawai kerajaan

Semenanjung yang bertugas di Sabah, yang jauh lebih tinggi berbanding pegawai kerajaan Sabah yang bertugas di Semenanjung.

Pada masa sama, ahli-ahli politik Pakatan Rakyat di Sabah juga seperti sedang mengalami konflik dalaman. ADUN Inanam (PKR), Roland Chia pernah menyatakan hasrat untuk meletakkan jawatan. Malah, selepas sahaja PRU-13, beberapa individu meletakkan jawatan dalam pimpinan negeri PKR atau keluar parti dan menjadi wakil rakyat Bebas, seperti ADUN Matunggong, Jelani Hamdan, dan ADUN Luyang (DAP) Hiew King Cheu. Mereka mendakwa bahawa perjuangan Pakatan Rakyat (PR) untuk memperjuangkan hak autonomi dan suara rakyat Sabah hanya sandiwara.

Politik BN dan PR di Sabah semakin lama semakin berkecamuk. Parti-parti pro-kapitalis seperti BN dan PR jelas gagal melakukan sesuatu untuk memperbaiki keadaan ekonomi di negeri itu. Parti mereka lebih banyak membincangkan

tentang kepentingan segelintir pihak sahaja dan tidak berusaha untuk mengagihkan kekayaan negara dengan adil dan demokratis kepada semua negeri. Sedangkan yang kaya bertambah kaya, dan yang miskin semakin teruk miskinnya. Konflik dalaman yang dialami juga membuktikan bahawa mereka tidak serius dalam membincangkan agenda rakyat, sebaliknya lebih berminat untuk menjaga kerusi dan kekuasaan masing-masing. Justeru, rakyat Sabah harus melihat bahawa kedua-dua BN dan PR gagal dalam mengangkat isu-isu masyarakat. Apakah parti-parti pro-kapitalis ini dapat membawa perubahan? Satu alternatif sosialis adalah sangat diperlukan, membina dan menyokong parti yang benar-benar berlandaskan rakyat bawahan dan kelas pekerja.



Hutang Luar Malaysia Mencecah RM 744.7 Billion

Dalam kenyataan akhbar pada 12 Mac yang lalu oleh Kementerian Kewangan, menunjukkan jumlah hutang luar negara adalah RM 744.7 bilion atau 69.6 peratus daripada KDNK berbanding RM 696.6 bilion pada 2013. Sebanyak 42 peratus pegangan sekuriti perdagangan dan deposit oleh rakyat asing. Hutang sektor swasta berada pada paras 37

peratus, hutang perusahaan awam sejumlah 10 peratus, bentuk pinjaman lain 9 peratus serta hutang luar pesisir kerajaan persekutuan turut menyumbang sebanyak 2 peratus. Walaupun Perdana Menteri mendakwa kenaikan hutang ini secara mendadak adalah disebabkan takrifan maksud baru hutang Negara oleh Tabung Kewangan Antarabangsa (IMF)

, ianya tidak mendedahkan keperluan kerajaan persekutuan untuk berhutang dengan begitu boros. Keadaan ini menunjukkan betapa runcingnya masalah ekonomi negara. Umum juga mengetahui bahawa di saat ekonomi antarabangsa yang terus meleset ia pasti akan membawa kesan yang negatif bagi rakyat biasa yang sedang bergelumang dengan kos sara

hidup meningkat setiap tahun, Kenaikan hutang negara pasti dibayar oleh rakyat biasa, bukannya pemimpin atau para peniaga besar iaitu kapitalis yang berhutang untuk demi kepentingan untung maksima mereka sahaja. Ternyata tanggungjawab dan amanah yang dilaung ketika pilihanraya umum

lepas hanya tinggal kenangan. Penganiayaan ini harus dihentikan dengan anak muda, para pekerja dan masyarakat di desa mengembang tenaga bersama bagi membentuk parti politik yang bebas daripada kongkongan golongan kaya serta berjuang untuk keperluan 99 peratus rakyat biasa.

Kekayaan 40 Kapitalis Tempatan Meningkat Lagi

Ravi

Ketika rakyat dibebankan dengan peningkatan kos hidup dan dasar-dasar seperti GST yang semakin memiskinkan, kekayaan 40 kapitalis negara terus meningkat 6.2% kepada 236.56 bilion. Kekayaan kapitalis-kapitalis ini tidak diperoleh seperti yang selalu digambarkan oleh media kapitalis sebagai hasil usaha atau kerja keras mereka. Kekayaan dijanakan melalui 'nilai lebihan' yang diwujudkan oleh pekerja dengan menjual tenaga buruh mereka untuk mendapatkan upah bagi menara hidup. 'Nilai lebihan'

inilah yang dimaksudkan sebagai keuntungan. Tetapi, dalam sistem kapitalisme, apa yang ketara adalah warga pekerja yang mewujudkan keuntungan tidak akan diberi peluang untuk menikmati keperluan dan kehidupan yang sewajarnya. Kapitalis tamak akan terus memperkayakan dirinya. Ini kerana sifat asas kapitalis adalah mengambil apa sahaja kesempatan untuk mendapatkan keuntungan walaupun harus dengan menindas pekerja dan rakyat biasa.



1MDB – Penyelewengan dan Kronisme

Sharifah



1Malaysia Development Berhad (1MDB) bukan mempunyai hutang biasa seperti yang didakwa oleh kerajaan. Ia telahpun mencapai hutang lebih RM40 bilion ringgit. Kerajaan juga tidak boleh mendakwa bahawa ia adalah masalah syarikat-syarikat yang terlibat kerana 1MDB dengan jelas adalah badan yang ditubuhkan dan dimiliki oleh kerajaan. Bahkan, kerajaan juga melanggar Akta Pencegahan Pengubahan Wang Haram apabila ia memindahkan lebih RM4 bilion dana 1MDB ke Cayman, dan apabila ia diletakkan di suatu bank di Singapura, dan tidak

dibawa balik ke Malaysia kerana keperluan ketat Bank Negara untuk pengeluaran melebihi RM50 juta. Dalam pada itu, penglibatan beberapa individu dalam 1MDB seperti Jho Low yang memiliki hubungan erat dengan Najib Razak juga membuktikan bahawa wujudnya penyelewengan dan kronisme.

Walaupun kerajaan mengumumkan bahawa 1MDB dijangka pulih hujung tahun ini dan suntikan modal diberikan, namun tindakan itu hanya bersifat sementara. Apakah lagi apabila penjualan aset melalui Penawaran Awam

Permulaan (IPO) menyebabkan tidak ada lagi aset untuk dijana bagi menampung hutang 1MDB yang masih besar. Dana awam juga tidak sepertutnya digunakan untuk melabur dalam IPO 1MDB kerana jika berlakunya kerugian lagi, ia akan menjejaskan rakyat. Bahkan, penyelewengan dan pengurusan ekonomi yang boros sehingga menyebabkan hutang 1MDB mendadak naik amat membimbangkan kerana jika ia tidak dapat dibayar, Malaysia kemungkinan akan mengalami kerugian yang besar sehingga menyebabkan kemuflisan.

Justeru, satu suruhanjaya bebas harus ditubuhkan untuk menyiasat dengan terperinci tentang penyelewengan dan penyalahgunaan kuasa Najib dalam 1MDB, seterusnya memastikan bahawa pihak-pihak yang terlibat dalam salah laku 1MDB ini dibawa ke muka keadilan. Dalam masa yang sama, rakyat harus menuntut supaya para pemerintah bertanggungjawab dalam isu ini, dan menjamin kepentingan rakyat dijaga dalam usaha untuk membayar balik hutang yang terlalu tinggi ini.

Kemalangan di Tempat Kerja: Tanggungjawab Siapa?

Menurut Kementerian Sumber Manusia, sektor pembuatan, perkhidmatan dan perdagangan borong dan runcit dikenal pasti sebagai sektor utama kekerapan berlakunya kes kemalangan di tempat kerja. Sehingga Jun 2014 sahaja, sebanyak 20,859 kes kemalangan tempat kerja telah dilaporkan dan daripada jumlah itu, sebanyak 282 kes melibatkan kemalangan maut. Angka kemalangan itu dijangkakan terus bertambah dari tahun ke tahun.

Bahkan, Pertubuhan Keselamatan Sosial (PERKESO) juga telah merekodkan lebih 55% daripada 52,934 kes sepanjang tahun 2014 adalah melibatkan kemalangan di tempat kerja. Dalam statistik

itu, 29,482 kes kemalangan direkodkan berlaku di tempat kerja. Ia diikuti dengan 23,452 kes kemalangan bagi perjalanan pergi dan balik kerja serta 789 kes lagi membabitkan nahas yang telah meragut nyawa.

Baru-baru ini, tiga pekerja warga Bangladesh telah terlibat dalam kemalangan di tapak pembinaan Mass Rapid Transit (MRT) Semantan, Kuala Lumpur dan salah seorang daripada mereka maut di tempat kejadian. Ini adalah kemalangan maut kedua di kawasan pembinaan MRT selepas insiden tapak Projek MRT di Kota Damansara pada 18 Ogos 2014. Pada 2 Februari 2015, lima pekerja cedera, seorang daripadanya parah apabila bumbung di pintu masuk

utama sebuah bangunan di kawasan KK Times Square, Kota Kinabalu, yang sedang dipasang runtuh. Pada 25 Februari 2015, tiga pekerja Tenaga Nasional Bhd. (TNB) cedera parah akibat terkena renjatan elektrik voltan tinggi ketika mereka sedang melakukan kerja-kerja penyelenggaraan di Klang Lama.

Majikan mesti peka terhadap setiap aspek keselamatan pekerja dan semestinya menyediakan peralatan keselamatan atau alat pelindung diri untuk pekerja masing-masing. Setiap ruang kerja dan penggunaan mesin jentera juga harus selamat daripada sebarang bahaya. Majikan tidak boleh berkompromi dalam isu keselamatan atau kesihatan

pekerja dan berusaha untuk mengelakkan pekerja daripada terdedah kepada bahaya. Hal ini kerana terdapat segelintir pihak yang hanya mahu meraih untung sehingga melupakan aspek keselamatan dalam menjana pendapatan. Mengikut Akta Keselamatan dan Kesihatan

Pekerjaan 1994, tanggungjawab ini adalah tanggungjawab bersama dan majikan mesti mengambil langkah yang sepatutnya sekiranya para pekerja membuat aduan tentang masalah keselamatan.



MAS: Majikan Silap, 6000 Pekerja Jadi Mangsa

Ravi

Kerugian MAS (Syarikat Penerbangan Malaysia) berpunca dari pihak pengurusan MAS tetapi warga pekerja yang dimangsakan dalam proses pengstruktur MAS yang dilancarkan pada tahun lalu. Dijangka 6000 pekerja MAS akan dibuang kerja dalam proses ini.

Apa yang jelas, kezaliman ini sedang berlaku dalam syarikat yang dimiliki oleh Kazhanah Nasional, yang merupakan salah satu unit pelaburan kerajaan. Seperti syarikat-syarikat kapitalis yang lain, Kazhanah juga mengutamakan keuntungan daripada kebijakan pekerja yang selama ini telah menyumbang kepada perkembangan dan kemajuan MAS.



Kesatuan Pekerja Bantah Penswastaan SESB!

Sharifah

Dalam keadaan ekonomi negara dan global yang tidak stabil, majikan tidak akan teragak-agak untuk memberhentikan pekerja atau menutup pelaburan mereka semata-mata keuntungan tanpa memikirkan masa depan pekerja. Apa yang berlaku kepada pekerja MAS, boleh berlaku kepada pekerja di sektor-sektor pekerjaan yang lain termasuk pekerja awam dan kerajaan jika ekonomi negara semakin merosot.

Kesatuan perlu melihat langkah-langkah perjuangan yang lebih berkesan termasuk tindakan industri atau mogok serta membina solidariti pekerja merentasi sektor untuk memperjuangkan hak pekerja.

Bahkan, cadangan untuk pengambilalihan ini hanya diberikan setelah SESB meningkatkan tarif elektrik dan mendapat peruntukan pembangunan. Apabila SESB mengalami masalah kewangan dalam kos operasi, inisiatif itu langsung tidak dicadangkan. Azhar menyatakan bahawa SHAREDA telah menyalahkan Caj Sambungan Pengguna atau Consumer Connection Charge sebagai punca utama harga rumah yang

semakin mahal di Sabah. Azhar sebaliknya meminta SHAREDA untuk tidak bercakap besar dan berusaha untuk mengawal harga rumah di negeri itu untuk manfaat semua rakyat. Dia juga mengharapkan SHAREDA membuktikan bahawa kos untuk segala jenis rumah akan dikurangkan sekurang-kurangnya 15% tahun ini.

Bantahan ini adalah tindakan yang tepat, dan Kesatuan Pekerja SESB harus bersatu memastikan bahawa pengambilalihan ini tidak akan berlaku. Sekiranya ia berjaya, maka penswastaan sepenuhnya terhadap SESB akan

dilaksanakan dan kepentingan semua pihak, khususnya rakyat dan kelas pekerja akan terjejas. Apatah lagi dengan kadar tarif elektrik yang telah dinaikkan, ini sudah tentu menarik minat sebarang syarikat atau pertubuhan swasta kerana ia adalah peluang untuk mereka mendapatkan keuntungan lagi. SESB seharusnya dimilik negara sepenuhnya kembali untuk memastikan keuntungan SESB disalurkan semula kepada rakyat, bukannya pemaju-pemaju perumahan yang sudah kaya.



Pekerja Bernama TV Piket

Yuva

Seramai 20 kakitangan Bernama TV telah mengadakan piket di Wangsa Maju, Kuala Lumpur pada Februari lalu bagi menuntut bayaran tunggakan gaji dari majikan mereka. Syarikat milik Bernama itu telah mengarahkan seramai 140 daripada pekerja untuk mengambil cuti kerana majikan tidak mampu membayar gaji bulanan mereka.

Para peserta piket tersebut antara lainnya membawa kain rentang dengan slogan "Manu Shabery", merujuk kepada Menteri Komunikasi dan Multimedia Datuk Seri Ahmad Shabery Cheek.

Sebahagian daripada saham Bernama TV dipegang oleh agensi berita nasional Bernama, yang terletak bawah bidang kuasa menteri tersebut.

Gaji terakhir bagi pekerja media ini adalah pada 24 Disember lalu pada masa permulaan permasalahan membayar gaji. Sehingga ke hari ini, pihak

pengurusan Bernama tidak dapat menyelesaikan masalah tersebut dengan keenggan pemilik saham swasta yang lain untuk terlibat dalam proses pembayaran gaji pekerja. Pihak swasta hanya menggondol kekayaan hasil keuntungan yang dihasilkan oleh pekerja dan melepaskan tanggungjawab membayar gaji sepenuhnya kepada pihak kerajaan yang memegang 33% saham.

Para pekerja yang turun berpicket juga membangkitkan isu yang hampir serupa yang dihadapi oleh pekerja sambilan RTM baru-baru ini. Pekerja sambilan RTM dikatakan terpaksa bekerja di restoran sebagai sambilan dan menangguhkan perancangan untuk mendirikan rumah tangga akibat masalah pembayaran gaji. Ini bukan kali pertama atau satu-satunya situasi yang melibatkan penindasan pekerja media di negara ini. Kebelakangan ini, kerena pelabur swasta dalam syarikat-syarikat gergasi yang sedang menampung pekerja yang

banyak semakin memudaratkan jaminan pekerjaan di sektor media. Sebagai contoh, pada awal bulan ini, seramai 60 orang pekerja Astro telah dibuang kerja dengan notis 24 jam.

Pekerja-pekerja media harus

menggunakan keadaan dan situasi sekarang untuk membina perpaduan di kalangan semua pekerja yang tertindas. Pekerja patut menyusun diri mereka kedalam satu organisasi yang kuat dan dapat mempertahankan hak-hak mereka dan pada masa

yang sama dapat mewujudkan solidariti di antara pekerja-pekerja lain. Kesatuan sekerja yang berpengalaman dalam isu-isu seperti ini diperlukan untuk memberikan semangat dan sokongan kepada pekerja media.



LINE HUEY TENG - MATKYSKOKWII

Pekerja Hotel Berpicket Membela Gaji



Kesatuan Kebangsaan Pekerja Hotel, Bar & Restoran, Semenanjung Malaysia (NUHBRW) telah melancarkan piket selama empat hari untuk membantah usaha pemilik-pemilik hotel yang ingin mengeluarkan hak pekerja untuk menerima caj perkhidmatan daripada perjanjian bersama (CA). Tindakan ini adalah helah pihak kapitalis dan pemilik hotel untuk menerapkan faedah-faedah pekerja seperti caj perkhidmatan ke dalam gaji pokok untuk memberikan gambaran palsu bahawa mereka menunaikan gaji minimum RM 900. Hotel mewah

Shangri-La mengambil peranan kepimpinan dalam melobi kepada hotel-hotel lain untuk mengikut langkahnya dalam usaha-usaha menghakis hak pekerja. Walaupun dengan keadaan harga barang dan perkhidmatan naik mendadak di samping rancangan kerajaan untuk mengenakan cukai GST, pihak kapitalis masih mencari jalan untuk memerah segala keuntungan yang terhasil daripada titik peluh pekerja. Ini adalah termasuk dalam keenggan untuk membayar pekerja dengan gaji yang berpatutan mengikut undang-undang.

Berpuluh-puluh pekerja hotel telah turun dengan sepanduk di hadapan Grand Millennium Hotel Kuala Lumpur pada 11 Mac lalu dalam satu aksi bantahan terhadap tindakan majikan. Piket anjuran NUHBRW telah dapat memberikan tekanan kepada majikan yang akhirnya terpaksa akur dengan tuntutan pekerja dalam mengekalkan hak caj perkhidmatan mereka di beberapa hotel. Di kebanyakan hotel lain, tekanan daripada

Shangri-La telah menyebabkan kebuntuan dalam rundingan antara majikan dan pihak kesatuan dan terpaksa diheret ke mahkamah untuk mendapat kata putus. Walaupun dilindungi oleh kesatuan sekerja dan perjanjian bersama CA, pekerja sering menjadi mangsa percaturan pihak majikan yang hanya mengira untung maksimum. Persoalan timbul kepada sebahagian besar pekerja yang tidak dilindungi oleh sebarang kesatuan sekerja di Malaysia. Pihak Kesatuan NUHBRW harus meningkatkan usaha mereka untuk memberikan tekanan yang mantap terhadap majikan dan pada masa yang sama menarik lebih ramai ahli ke dalam kesatuan. Bagi mendapatkan sebarang hasil daripada perjuangan terhadap majikan jutawan yang berkuasa, pekerja perlu menyatukan tenaga mereka dalam aksi-aksi seperti piket dan mogok bagi memelihara kepentingan para pekerja.

Majikan Menindas Hak Bersolat Pekerja!

Zul



Hak bagi pekerja di sebuah kilang atau pejabat untuk bersolat atau menunaikan hak agama memang tidak diperuntukkan di dalam undang-undang buruh.

Walaubagaimana pun, ini tidak bermakna pekerja yang mahu menunaikan haknya tidak dihormati oleh majikan. Di Malaysia, terdapat banyak kes di mana pihak majikan bukan

sahaja tidak membenarkan hak pekerja untuk solat, malah ada yang dipotong gaji, diberi amaran keras, dan diugut berhenti kerja. Pada bulan Februari lalu terdapat sebuah kes pekerja di sebuah pasaraya di Muar, yang mana pekerja beragama Islam tidak dibenarkan untuk

menunaikan solat ketika waktu bekerja dan waktu rehat. Dikatakan ada pekerja yang dimarah dan dilontarkan kata-kata kesat oleh majikan setelah di kesan menunaikan hak solat ketika

waktu bekerja. Malah lebih teruk, ada pekerja yang ditarik ketika sedang menunaikan solat di bilik rehat untuk masuk ke pejabat. Menurut sumber, pekerja merasa lebih tertekan apabila sebelum ini sebuah bilik rehat yang digunakan untuk pekerja menunaikan solat, dikunci selepas waktu rehat sehingga tamat waktu bekerja. Keadaan ini menyebabkan terdapat pekerja yang terpaksa bersolat di ruang kecil seperti di stor barang. Ada pekerja yang tidak tahan penindasan sebegini beberapa kali memohon untuk berhenti kerja, namun tidak dibenarkan oleh pihak majikan. Diskriminasi ke atas hak mengamalkan agama bagi setiap individu harus dihapuskan. Majikan seharusnya menghormati pekerja yang ingin menunaikan hak agama mereka, tanpa mengira latar belakang agama atau bangsa. Melalui kes

pekerja yang dilaporkan diatas, ia seterusnya membuktikan bagaimana kebajikan dan keperluan pekerja semakin terhakis dan diabaikan oleh majikan kapitalis yang hanya mengutamakan keuntungan dan kepentingan mereka sendiri.

Isu yang dihadapi oleh pekerja pada hari ini bukan sahaja mengenai hak untuk solat di tempat kerja, malah terdapat pelbagai lagi isu yang dihadapi oleh golongan pekerja di Malaysia, seperti ketidaktelusan perlaksanaan gaji minima, penafian hak cuti bersalin, larangan untuk berkesatuan dan lain-lain lagi. Pekerja perlu menuju kesatuan pekerja atau jawatan kuasa pekerja di tempat kerja bagi menggerakkan tuntutan hak pekerja dan menjadi semak-imbang kepada setiap polisi majikan yang dirasakan menindas atau mendiskriminasi pekerja.

Hak Pekerja Migran : Satu Kepedulian!

Qira

Pada 24 dan 25 Januari yang lepas Solidariti Pekerja telah menyertai bengkel mengenai kebebasan berkesatuan dan hak-hak pekerja. Program selama 2 hari ini turut disertai oleh buruh migran dari Indonesia, Kemboja, Myanmar dan Filipina. Bengkel ini berguna terutamanya bagi pekerja migran untuk mengetahui, apakah tindakan-tindakan yang boleh diambil sekiranya hak selaku pekerja dizalimi. Selain itu, bengkel yang dihadiri tidak hanya lesu dengan perbincangan satu hala, tetapi turut membuka ruang bagi mereka untuk berkongsi pengalaman, dan ternyata, penindasan dan eksploitasi masih berlaku - ada pasport yang ditahan oleh majikan, gangguan seksual, penerimaan gaji yang ditangguh tangguhkan, begitu juga dengan penindasan oleh agensi pengambilan pekerja migran. Mengikut undang-undang Malaysia, agensi pekerjaan tidak boleh meminta lebih daripada sebulan gaji pekerja untuk kos pengambilan pekerja. Misalnya, kalau gaji pekerja itu adalah RM900, maka agensi pekerjaan tidak boleh mengambil lebih daripada itu. Namun, ada yang mengenakan caj pengambilan pekerja yang melampau sehingga ada agensi

yang meminta RM14000 walaupun gajinya sedikit cuma! Hal ini tidak termasuk dengan kondisi tempat tinggal mereka yang begitu daif, bayangkan, ada pekerja migran yang ditempatkan dalam sebuah bilik kecil dengan 2 katil bersama 6 orang. Bagaimana pula dengan kos perubatan bagi pekerja migran yang semakin meningkat? Bulan Mac yang lalu, Akta Kemudahan dan Perkhidmatan Jagaan Kesihatan Swasta telah dilaksanakan secara senyap-senyap. Beberapa hari kemudiannya, Menteri Kesihatan, S. Subramaniam mengumumkan dalam sidang media bahawa sebanyak 14% ke 18% kenaikan kos perubatan swasta telah dilaksanakan. Susulan dari itu, Kementerian telah juga mengambil keputusan untuk menghentikan subsidi perubatan bagi pekerja migran. Seharusnya isu-isu pekerja migran ini turut menjadi sebahagian dari kedudukan kita terhadap perkembangan ekonomi Malaysia, kerana seringkali mereka yang menjadi kambing hitam. Sedangkan mereka juga yang menjadi sebahagian dari tenaga penjana produksi ekonomi negara. Mereka juga memberi sumbangan terhadap pembangunan

negara. Hakikatnya mereka juga tergolong dalam kelas pekerja, namun kondisi mereka jauh lebih runcing berbanding pekerja tempatan. Contohnya, kenapa dalam satu-satu kilang terdapat ramai pekerja migran dari berbagai negara? Kenapa tidak diambil dari satu negara sahaja? Ya, memang benarlah kerana gaji yang dibayar lebih murah berbanding pekerja tempatan, namun selain itu, muslihat kapitalis mengambil pekerja migran adalah juga kerana beberapa perbezaan yang boleh diambil kesempatan, seperti bahasa. Sebagai contoh,

kontrak bekerja yang disediakan samaada dalam Bahasa Melayu ataupun Inggeris, menyebabkan kebanyakkan pekerja migran yang kurang fasih tidak faham akan isi yang terkandung, oleh itu, pekerja migran ini terhimpit dalam situasi yang tidak banyak pilihan, mengecilkan ruang mereka untuk menyatakan dan mengetahui penindasan yang berlaku ke atas diri mereka. Tidak itu sahaja, pengambilan pekerja migran dari pelbagai negara juga adalah antara sebahagian taktik kapitalis untuk memisahkan-misahkan pekerja mengikut negara, supaya

keterbatasan bahasa, budaya dan sebagainya membuatkan semua mereka tidak dapat bersatu. Ini taktik kapitalis! Perubahan terhadap struktur ekonomi negara memerlukan keterlibatan semua pekerja tidak kira dari mana-mana negara sekalipun. Jikalau semua pekerja bersatu dan bersolidariti menuntut hak-hak asasi seperti gaji yang adil, kebajikan dan tempat tinggal, pasti ia dapat menggagarkan posisi kapitalis yang cuma mahukan keuntungan semata-mata. Ayuh kaum pekerja, bersatulah!



6 Organisasi Pekerja Iran Menuntut Kenaikan Gaji Minimum

Permulaan Mac menyaksikan puluhan ribu guru di seluruh Iran dari setiap peringkat melancarkan protes "senyap" terhadap gaji yang sangat kecil. Ini adalah sebahagian daripada peningkatan permintaan untuk menampung perbelanjaan hidup. Pada bulan Februari lalu, enam organisasi pekerja mengeluarkan kenyataan yang menghendaki peningkatan dalam gaji minimum, yang telah diterima oleh Solidariti Pekerja, diterjemah dan disiarkan di bawah.

Kami, pekerja, bergantung kepada kekuatan kesatuan dan perpaduan, kami tidak akan teragak-agak untuk mempertahankan mata pencarian kami.

Hari ini, setiap manusia yang baik akan menyedari hakikat yang tidak dapat dinafikan bahawa berjuta-juta orang yang bekerja dalam industri besar dan kecil, guru, jururawat dan pesara berada dalam keadaan yang paling teruk dalam sejarah negara ini. Ini bermakna, menurut pakar-pakar dan pegawai kerajaan, kehidupan berjuta-juta keluarga kini telah jatuh di bawah garis kemiskinan dan keperluan asas seperti buah-buahan, daging dan produk tenusu terpaksa dikeluarkan dari meja makan keluarga.

Syarat-syarat dahsyat

tersebut tidak berlaku ke atas sebuah negara yang sedang musnah akibat kebuluran, syarat ini dikenakan ke atas pekerja di negara yang mempunyai tenaga kerja yang muda, berpendidikan dan mahir di mana terdapatnya gabungan rizab minyak dan gas yang terbesar di dunia. Adakah ia tidak memalukan bawa seorang guru terpaksa menampung perbelanjaan hidup mereka dengan bekerja sebagai pemandu teksi atau bas sebagai kerja kedua mereka? Adakah pesara di negara ini berhak untuk merasa tekanan dan kebimbangan yang besar dalam kehidupan mereka kerana pencen mereka yang sedikit itu? Ini adalah sebuah negara di mana berjuta-juta pekerja yang bekerja 12 hingga 18 jam setiap hari, namun tidak mampu menyediakan keperluan asas keluarga mereka dan terpaksa merasa malu di hadapan kanak-kanak mereka sendiri. Adakah anda bersetuju bahawa di negara ini beratus ribu orang berada di tahap menjual buah pinggang mereka, melacurkan diri, terjerat dalam ketigihan, kesengsaraan dan kekecewaan dari remaja ke tua?

Tidak dinafikan, pekerja-pekerja Iran terus memperjuangkan hak-hak mereka walaupun penindasan yang teruk dari pihak majikan dan kerajaan. Dengan

penangkapan, pendakwaan dan penjara, pejuang kelas pekerja sentiasa mencari jalan untuk bertindak, sama ada dengan menulis petisyen, berpicket atau mogok. Kami menuntut menamatkan keadaan sengsara sekarang kerana pekerja di negara ini seperti tidak mempunyai hak untuk hidup.

Gaji minimum yang sedia ada di sekitar 608,000 Toman (RM670) itu tidak diendahkan oleh kebanyakan majikan dan kerajaan juga gagal untuk mengambil sebarang tindakan yang wajar terhadap situasi tersebut. Menurut pakar dan institusi rasmi kerajaan, perbelanjaan untuk sebuah keluarga yang mengandungi empat orang adalah lebih daripada 3 juta Toman (RM3360) sebulan, dan

dengan itu kesinambungan bagi kehidupan pekerja kita adalah sesuatu yang mustahil.

Oleh itu, berdasarkan fakta-fakta yang disahkan dan tidak dapat dinafikan sambil mengingati protes baru-baru ini oleh guru-guru dan pekerja-pekerja dalam industri automotif dan penjawat awam, kami yang menandatangani kenyataan ini mengisyiharkan keazaman teguh kami untuk menuntut sebuah kehidupan yang mengikut piawaian yang diperlukan. Kami segera mengisyiharkan kepada kerajaan dan pemilik modal bahawa jika gaji minimum 608,000 Toman yang menghinakan itu tidak dinaikkan kepada gaji yang dapat memulihkan maruah pekerja, protes akan menjadi

lebih mendalam dan lebih luas setiap hari. Kami yang bergantung kepada kekuatan pakatan kami tidak akan teragak-agak seketika untuk mempertahankan kehidupan kami sebagai kelas pekerja.

Feb 21, 2015

Kenyataan ini ditandatangani oleh:
Kesatuan Perdagangan Bebas Pekerja Iran, Jawatankuasa Penubuhan Organisasi Pekerja di Iran, Persatuan Pembela Hak-hak Buruh, Jawatankuasa Penyelaras Bantuan kepada Organisasi Pekerja, Kesatuan Pekerja Tebu Haft Tapeh, Kesatuan Pelukis Wilayah Alborz.



Ireland Utara : Pekerja Sektor Awam Mogok Menentang Pemotongan Perbelanjaan Awam oleh Kerajaan

CWI Ireland Utara

Jumaat 13 Mac menyaksikan berpuluhan-puluhan ribu pekerja dalam bidang pendidikan, kesihatan, perkhidmatan dan pengangkutan awam mengambil bahagian dalam tindakan mogok yang bertujuan membantah agenda penjimatan kerajaan Ireland Utara.

Walaupun terdapat pelbagai propaganda media oleh pihak kerajaan untuk menggagalkan mogok tersebut, beratus ribu warga pekerja dan ahli kesatuan sekerja telah turun dan menjayakan aksi mogok

tersebut. Mogok ini disokong oleh hampir 82% rakyat berdasarkan kepada kaji selidik bebas.

Parti Sosialis Ireland Utara (CWI) yang terlibat secara aktif dalam mogok tersebut dan mengedarkan sepuluh ribu risalah bagi menyeru kepada para pekerja untuk meneruskan perjuangan mereka. Parti Sosialis Ireland Utara juga telah melebarkan perjuangan dengan mendapatkan sokongan solidariti daripada golongan mahasiswa dan pelajar sekolah.

Semangat perjuangan kelas pekerja ini perlu disebarluaskan, diperluaskan dan diteruskan untuk membina kekuatan sehingga rancangan kerajaan untuk melancarkan agenda penjimatan itu gagal.



Politik Perkauman dan Masalah Ekonomi

Sharifah

Sejak dahulu, perkauman dianggap isu utama yang mengganggu keharmonian negara. Para pemerintah pun melancarkan dasar dan agenda tertentu seolah-olah untuk mengelakkan perkauman. Sebagai contoh, 1Malaysia yang diperkenalkan oleh Najib. Namun, setelah beberapa tahun pelaksanaannya, masih banyak isu perkauman. Persoalannya, siapakah yang mempromosi perkauman ini?

Jika diteliti dengan dalam, perkauman banyak dimulakan oleh parti-parti politik dan penyokong-penyokongnya. Mereka memprovokasi kaum-kaum lain untuk memastikan bahawa rakyat berpecah dan memudahkan pemerintah

mengawal rakyat. Ini adalah ‘pecah dan perintah’. Bahkan, taktik ini membuatkan rakyat lupa bahawa ada isu yang lebih penting, iaitu masalah ekonomi dan kos sara hidup yang semakin hari makin menghimpit – dengan kenaikan harga barang, GST, tambang pengangkutan awam dan sebagainya. Ia taktik biasa oleh parti-parti pro-kapitalis yang hanya berniat untuk memastikan kepentingan orang tertentu sahaja dijaga, para pemodal dan orang-orang kaya.

Hal ini terbukti dengan kebangkitan banyak kumpulan seperti ISMA dan PERKASA yang bersifat perkauman. Kemunculan mereka ini amat membimbangkan

khususnya golongan yang cuba menggunakan isu kaum demi kepentingan mereka. Anehnya, jika dikatakan rakyat Malaysia mengamalkan perkauman, mengapa senarai golongan terkaya di Malaysia daripada berbagai kaum menunjukkan mereka boleh pula bersatu untuk meningkatkan kekayaan mereka?

Oleh itu, kita perlu melihat bahawa masalah-masalah ekonomi bukan kerana perbezaan kaum tetapi kerana dasar-dasar kapitalisme yang tidak menyebelahi rakyat biasa dan kelas pekerja. Apatah lagi apabila jurang perbezaan antara yang kaya dan miskin semakin hari makin jauh. Maka, kelas pekerja dan rakyat bawahan

tanpa mengira kaum harus bersatu menuntut supaya para pemerintah tidak mengamalkan retorik perkauman, sebaliknya melaksanakan dasar ekonomi yang adil dan demokratis untuk semua rakyat. Politik perkauman

tidak patut dimainkan kerana ada isu yang lebih mustahak – kehidupan masyarakat yang kais pagi makan pagi, bahkan kais pagi pun masih berlapar pada paginya!



Anwar Mangsa Percaturan Politik Kapitalisme

Ravi



Pada 10 Februari lalu, Anwar Ibrahim, dijatuhkan hukuman penjara selama 5 tahun oleh Mahkamah Persekutuan yang menolak rayuannya terhadap sifit sifit bagi kes liwat 2.0. Pada akhir penghakiman, Anwar membantah dari kandang tertuduh, memberitahu hakim bahawa mereka telah menjadi “rakan kongsi dalam menjahat pembunuhan kebebasan kehakiman”.

Kehakiman tersebut secara meluas dianggap sebagai komplot politik oleh kerajaan BN di bawah pimpinan Najib Razak untuk melemahkan Pakatan Rakyat yang semakin mendapat sokongan dalam dua pilihan raya umum yang lalu. Solidariti Pekerja mengutuk tindakan yang

tidak bertanggungjawab kerajaan pemerintah yang mempergunakan mahkamah, media dan jentera-jentera kerajaan yang lain untuk menidakkannya kebebasan dan hak demokrasi pembangkangan dan juga rakyat biasa.

Pungutan suara Merdeka Center bulan Oktober lalu mendedahkan bahawa 48% rakyat sama ada mempunyai sedikit keyakinan atau tidak yakin langsung dengan kebebasan badan kehakiman negara. Dengan pencabulan hak demokrasi yang lain ditambah dengan ketidaktentuan dalam ekonomi dan keperluan sosial yang semakin merosot, rasa tidak percaya rakyat terhadap kerajaan BN dijangka semakin meningkat.

Kerajaan-kerajaan luar negara seperti Amerika Syarikat dan Australia telah mengeluarkan kenyataan mengkritik keputusan mahkamah sebagai satu penghakiman yang ‘bermotifkan politik’, tetapi apabila Obama dan Tony Abbott baru-baru ini melawat Najib (Obama juga bermain

golf dengan Najib di Hawaii Disember lalu), mereka langsung tidak memberi tekanan kepada mahkamah yang adil untuk Anwar. Ini sekali lagi menunjukkan kepura-puraan dan tidak konsisten kerajaan-kerajaan kapitalis terhadap hak-hak dan ketidakadilan demokratik. Tetapi beberapa pemimpin antarabangsa semata-mata membantah keputusan Anwar kerana mereka adalah dari sekolah pemikiran kapitalisme pasaran bebas yang sama. Anwar telah menyokong kuat agenda Bank Dunia dan IMF terutamanya ketika krisis kewangan 1998.

Sehari selepas keputusan mahkamah, anak-anak Anwar

mengumumkan bahawa mereka akan mengetuai ‘Perarakan Untuk Kebebasan’ untuk meneruskan perjuangan untuk mendapatkan keadilan untuk ayah mereka tetapi bagaimana inisiatif tersebut akan dibina masih tidak jelas. Inisiatif sedemikian mampu meraih sokongan tetapi perlu berupaya menyatukan rakyat biasa, termasuk golongan anak muda dan kelas pekerja, dengan program untuk hak demokrasi serta hak-hak ekonomi dan sosial yang adil dalam usaha untuk memerangi perkauman dan kapitalisme.

Sentimen agama dan kaum yang dipergunakan oleh kumpulan ekstrimis mewujudkan kegelisahan dan rasa tidak selamat tetapi mereka tidak disentuh dibawah Akta Hasutan kerajaan manakala akta yang sama digunakan untuk melenyapkan suara bangkangan dan penentangan. Ini mendedahkan hipokrasi kerajaan pemerintah yang tidak akan teragak-agak untuk menggunakan sentimen agama dan kaum untuk terus ‘pecah dan perintah’ dan mengekalkan kuasanya.

Terdapat keperluan untuk anak-anak muda, kesatuan sekerja dan kelas pekerja bersatu untuk melawan perkauman dan apa-apa percubaan untuk mewujudkan ketidakharmonian dalam masyarakat oleh kumpulan ekstrimis atau sayap kanan parti-parti politik, dan

memerangi ketidaksamaan ekonomi dan sosial yang menjadi landasan mencetuskan sentimen perkauman.

Percubaan berterusan oleh Mahathir dan kini Najib untuk melemahkan Anwar Ibrahim telah menunjukkan ketakutan golongan pemerintah dan kapitalis kroni kepada kehilangan kuasa dan keistimewaan mereka, dan juga ketakutan mereka akan terdedahnya skandal dan rasuah yang sekian lama tersembunyi.

Sistem tidak adil dan rasuah, dan jentera yang telah dipergunakan untuk memangsakan Anwar adalah sebahagian daripada agenda kapitalisme yang dikendalikan oleh BN. Tetapi semata-mata pembaharuan dalam sistem, seperti yang dilauangkan oleh Pakatan dan kepimpinannya, manakala 1% terkaya terus mengawal harta dan kekayaan majoriti, tidak akan mencabut kebusukan sistem yang menyekat hak demokrasi dan keperluan sosio-ekonomi rakyat biasa.

Hanya melalui penyertaan golongan muda dan kelas pekerja di bawah kepimpinan parti massa berdasarkan keperluan mereka dan sosialisme demokratik sebagai alternatif, maka sistem yang zalim dan gila kuasa mampu dikalahkan, dan sebuah kerajaan demokratik dan adil yang mengutamakan keperluan sosial dan ekonomi majoriti rakyat dapat dibina.

Sejarah Hari Wanita – Mengingati Perjuangan Pekerja

Sharifah

Pada 8 Mac 1857, beribu-ribu pekerja perempuan kilang pakaian di New York telah melakukan protes terhadap kondisi tempat kerja yang tidak berperikemanusiaan dan upah yang sangat rendah. Pada 8 Mac 1908 pula, 30,000 orang pekerja perempuan di bandar sama telah menuntut jam kerja yang lebih pendek. Berita mengenai tuntutan para pekerja perempuan Amerika Syarikat untuk upah yang lebih tinggi, kondisi kerja yang lebih baik dan pengurangan jam kerja ini telah diketahui dan turut dituntut oleh ramai aktivis sosialis di banyak negara.

Clara Zetkin yang mengetahui hal ini kemudian mengusulkan pada tahun 1910 dalam persidangan internasional supaya diraikan Hari Wanita setiap tahun untuk mengenang

perjuangan para pekerja perempuan yang terdahulu dan untuk terus menuntut hak-hak pekerja yang masih belum dipenuhi. Cadangan itu disetujui oleh para delegasi yang mewakili 17 negara dan dihadiri lebih daripada 100 orang. Bahkan, ketika terjadinya Perang Dunia, Hari Wanita yang diraikan juga untuk menentang perperangan dan menuntut perdamaian. Pada tahun 1913, ramai wanita di Rusia yang turun ke jalan raya untuk membantah perperangan, dan protes yang terbesar adalah pada 8 Mac 1917 yang dikenali sebagai demonstrasi ‘roti dan perdamaian’ – melambangkan tuntutan untuk ekonomi dan kehidupan yang lebih baik.

Tindakan mogok oleh pekerja wanita di Rusia pada 8 Mac 1917 telah ‘merasmikan’ sebuah revolusi di negara tersebut

yang telah berjaya membawa demokrasi yang tidak pernah dilihat dimana-mana negara sebelum itu. Revolusi tersebut juga telah menghasilkan hak mengundi bagi kaum wanita yang pertama di dunia dan 8 Mac ditanda sebagai hari wanita sedunia.

Secara ringkasnya, kita dapat melihat bahawa Hari Wanita adalah hari yang sangat bersejarah bagi golongan wanita, khususnya para pekerja. Titik peluh dan perjuangan mereka untuk menuntut gaji yang setimpal, kondisi tempat kerja yang selamat dan

sebagainya harus dihargai dan diambil teladan untuk sesiapa sahaja sekalipun supaya terus berjuang membantah penindasan. Ia harus diangkat dan diingati sebagai hari perjuangan kelas pekerja, bukannya seakan-akan sebagai Hari Valentine ketika begitu ramai pekerja perempuan telah terkorban untuk memastikan hak-hak pekerja dipenuhi.

Justeru, Hari Wanita haruslah diingati sebagai hari perjuangan, suatu ingatan kepada semua kelas pekerja, tidak kira lelaki atau wanita, bahawa jika ada penindasan, maka perjuangan harus terus dilaksanakan!



Aksi Mogok Berjaya Mengubah Struktur Gaji Pekerja Lombong

Ravi

5 Mac 1963 menandakan hari apabila undi mogok 13000 pekerja perlombongan di Semenanjung Malaysia mampu merubah struktur gaji dan keadaan kerja 17000 pekerja perlombongan timah di negara ini.

93 peratus daripada ahli-ahli dari Kesatuan Sekerja Perlombongan Kebangsaan (NMWU) mengundi setuju untuk mogok 14 hari di 12 lombong milik kapitalis Eropah untuk menuntut 2 bulan bonus dan keadaan kerja yang lebih baik.

Ini adalah berikutan ketiadaan bonus pada tahun 1962 walaupun tahun itu agak menguntungkan bagi syarikat-syarikat perlombongan, dan rundingan antara kesatuan dan persatuan majikan lombong runtuh apabila majikan enggan untuk berunding tentang bonus.

Mogok yang dijadualkan pada 23 Mac telah dibatalkan pada saat akhir berikutan rayuan oleh Perdana Menteri atas alasan kepentingan negara kerana ‘konfrontasi’ terhadap dasar Indonesia.

Walau bagaimanapun pada 30 September, perwakilan dalam persidangan tahunan NMWU memutuskan untuk mendesak tuntutan bonus dan pada 8 April 1964, kesatuan berjaya memulakan rundingan dengan persatuan majikan.

Sebulan kemudian, perjanjian gaji baru telah ditandatangani. Majikan bersetuju untuk membayar jumlah tambahan sebanyak RM 4.2 juta untuk setiap tahun. Syarat-syarat perjanjian termasuk 6% kenaikan gaji asas, 8% simpanan tahunan, 10% kenaikan tahunan untuk gaji harian dalam gred mereka, cuti tahunan yang lebih baik, eluan lebih masa dan eluan

kerja luar kawasan yang lebih baik dan bonus tahunan.

Pada awal Januari 1965, 17000 pekerja perlombongan timah menerima pembayaran mereka menandakan satu kejayaan besar dalam sejarah kesatuan buruh di Malaysia.

Kejayaan ini menunjukkan betapa pentingnya hak mogok kepada pekerja untuk menuntut hak dan keperluan mereka daripada majikan. Mogok mencerminkan betapa pentingnya kuasa buruh untuk menjana keuntungan kepada majikan. Jika pekerja tidak berkerja, majikan tidak mampu menjana keuntungan. Sebab itu, majikan terdesak untuk membuat rundingan untuk mencapai satu penyelesaian yang adil kepada pekerja. Hak mogok harus diperjuangkan oleh kesatuan sekerja dan pekerja untuk mengembalikan semula hak-hak

pekerja yang semakin terhakis.

Miners vote: 93 p.c. say ‘strike’

KUALA LUMPUR, Mon. — The 14,000-strong National Mining Workers' Union is to issue a 14-day strike notice on Saturday to European-managed tin mines in the country.

The counting of the secret ballot, which started at the union's headquarters here on Saturday and ended this evening, showed that 93 per cent of the votes were for a strike.

The decision to strike followed the breakdown of talks last Wednesday between the union and the Malayan Mining Employers' Association on annual bonus.

A WARNING

It will affect 12 leading European-managed mines which take the stand that bonus is not negotiable.

The union's executive general secretary, Mr. M. Arokiasamy, said tonight that 14 days' strike notice will be served simultaneously to the 12 companies on Saturday.

"Unless something extraordinary intervenes the strike will begin at 6 a.m. on Saturday, March 23."

Mr. Arokiasamy added that the All-Malayan Mining Industry Staff Union, which is involved in a similar dispute with European mining companies, would co-operate in the strike.

He warned political parties and politicians that the Malayan Trade Union movement would not tolerate interference.

SOLIDARITI PEKERJA

ISU KE - 11

APR - MEI 2015

HARGA : RM 2 / SOLIDARITI : RM 3

Pendirian Gabungan Pekerja dan Anak Muda

Pendidikan

- Hak Pendidikan yang percuma dan berkualiti untuk semua termasuk di Universiti dan Kolej: Memansuhkan yuran pengajian di Universiti dan Kolej dan menghapuskan hutang pelajar termasuk PTPTN.
- Menuntut autonomi sepenuhnya kepada universiti dan kolej untuk mengeluarkan graduan kreatif untuk pembangunan keperluan rakyat biasa dan bukannya berpaksikan kepada keuntungan maksimum kapitalis.
- Tidak kepada penswastaan pendidikan termasuk pengkorporatan universiti dan kolej awam. Memilikan negara atau pemilikan awam segala entiti pendidikan daripada tadika hingga ke universiti dengan pembiayaan yang secukupnya untuk meningkatkan kemudahaan dan kualiti pendidikan.
- Menyokong hak pekerja awam di bidang pendidikan, guru dan pensyarah untuk mempertahankan hak mereka dan autonomi pendidikan.
- Untuk mentransformasikan Persatuan Pelajar kepada Kesatuan Pelajar yang bebas, demokratik dan memperjuangkan hak dan keperluan pelajar.
- Untuk membentuk pendidikan yang dibiayai sepenuhnya oleh kerajaan melalui pemilikan awam, dan ianya diuruskan secara demokratik dan percuma di semua peringkat - sistem pendidikan sosialis.

Pekerjaan dan Kebajikan

- Menyokong perjuangan anak muda dan warga pekerja untuk hak pekerjaan.
- Hapuskan pengangguran dengan hak pekerjaan yang adil untuk semua.
- Hapuskan polisi 'buruh murah' atau penghambaan pekerja, dengan mewujudkan gaji minimum atau gaji saraan hidup (living wage) yang setimpal dengan kenaikan inflasi.
- Hapuskan amalan 'outsourcing' dan buruh kontrak yang mengakis hak pekerja dan

kesatuan sekerja.

- Peluang latihan yang adil untuk anak-anak muda dengan gaji saraan hidup, termasuk pekerjaan yang terjamin selepas latihan.
- Hentikan pembuangan pekerja di sektor awam atau swasta. Milik negara syarikat yang mengancam penutupan, di bawah kawalan demokratik oleh kesatuan sekerja dan warga pekerja.
- Majikan harus memperuntukkan elaun perumahan, pengangkutan, makanan dan faedah-faedah lain yang diperlukan untuk kebajikan pekerja.
- Hak penubuhan kesatuan sekerja tanpa sebarang sekatan undang-undang oleh kerajaan atau campurtangan majikan.
- Pinjaman perumahan tanpa faedah oleh kerajaan untuk memastikan keluarga miskin memiliki tempat kediaman. Pinjaman perumahan kerajaan dengan faedah yang rendah harus diperluaskan kepada warga pekerja di sektor swasta.
- Membina tempat-tempat rekreasi awam percuma dan berkualiti kepada anak muda dan pekerja.

Hak dan demokrasi

- Mempertahankan hak untuk membantah dan berdemonstrasi. Tiada penganiayaan kepada penunjuk perasaan. Hak untuk berorganisasi di setiap sekolah, kolej dan universiti.
- Hentikan keganasan polis terhadap demonstrasi dan rakyat biasa.
- Tiada rasisme, seksisme, homophobia, dan semua bentuk diskriminasi.
- Pertahankan hak dan budaya semua minoriti termasuk orang asal.
- Hak pekerjaan, perumahan dan perkhidmatan tanpa diskriminasi kaum, agama dan jantina .
- Hentikan serangan ke atas hak-hak wanita.
- Wujudkan semula pilihanraya kerajaan tempatan di setiap daerah.
- Tidak kepada parti-parti yang berlandaskan

kapitalisme. Berkempen untuk pembinaan parti massa kelas pekerja dan anak muda untuk mempertahankan hak dan kepentingan rakyat biasa.

- Hentikan penswastaan perkhidmatan awam. Memilikan negara semula semua kemudahaan awam dengan kawalan demokratik kesatuan sekerja dan rakyat biasa.
- Hentikan GST, TPPA, pemotongan subsidi dan mula merancang ekonomi berlandaskan keperluan rakyat, bukan keuntungan maksimum

Untuk Solidariti Antarabangsa dan Demokratik Sosialisme

- Untuk solidariti antara kelas pekerja dan anak muda di seluruh dunia.
- Solidariti dengan Perjuangan Anak Muda dan Pekerja di Timur Tengah/Afrika Utara untuk pembentukan kerajaan kelas pekerja dan petani miskin.
- Tidak kepada perperangan dan campur tangan imperialis. Untuk pengosongan segera semua tentera asing dari Afghanistan dan Iraq.
- Tamatkan kepungan Gaza di Palestin dan hormati hak pembentukan negara Palestin.
- Hentikan pembinaan peluru berpandu nuklear dan hapuskan segala senjata yang boleh memusnahkan alam.
- Menyokong kempen solidariti Tamil Sri Lanka - untuk hak semua rakyat untuk menentukan pilihan sendiri.
- Tidak kepada kemasuhan alam sekitar. Bagi pelan yang mampan berlandaskan kepada demokratik sosialisme untuk industri pengeluaran yang tidak akan memusnahkan planet ini.
- Tidak kepada kapitalisme. Bagi dunia sosialis, di mana monopoli besar dijadikan pemilikan awam, dengan ekonomi yang dirancang secara demokratik dan sumber-sumber alam dipergunakan untuk memenuhi keperluan manusia sejagat.

Adakah anda mempunyai berita tentang pekerja untuk kami ?

Adakah anda ingin berkerjasama atau ingin tahu lebih lanjut tentang kami ?

Hubungi kami di :-

 <http://www.facebook.com/solidaritipekerja>

@ solidaritipekerja@gmail.com

 01112859623 (yuva)



Sosialis Alternatif adalah sebahagian daripada pertubuhan sosialis dan kelas pekerja antarabangsa (Committee for a Workers' International) yang beroperasi di lebih 50 buah negara. Sosialis Alternatif berkempen menentang penindasan kapitalisme ke arah membentuk masyarakat yang berlandaskan demokratik sosialisme di Malaysia dan sedunia.